

Gij Gojgaeq Aendoih Fwen Maenhndei Guengjsae

广西优秀民歌队的故事

Bi 2018 Comzyienj Fwen Minzczuz Vunznoix Guengjsae Riengzlaeng Bauqlwnh

□ Cau Dwzfeih raiz Dahdingz hoiz

Ndwen 8 ngoenz 28 daengz ngoenz 29, bi 2018 comzyienj fwen minzczuz vunznoix Guengjsae youq Namzningz Si Vujmingz Gih banh. Baez hozdung comzyienj fwen neix yinx daeuj Namzningz、Liujcouh、Gveilinz、Gveigangj、Hocouh、Hozciz、Baksaek、Ginhcouh、Fangzcwnzgnggangj、Cungzcoj daengj 10 aen si 23 aen doih fwen minzczuz vunznoix caeuq Guengjsae Sawcuengh Hagdangz、Guengjsae Vaigozyij Yozyen、canghgo ndawbiengz Bouxcuengh Luz Yiz daengj 7 aen cezmuz daegbied iucingj camgya yienjok, gungh 31 aen cezmuz、180 lai boux canghfwen minzczuz vunznoix camgya yienjok, neix bonj-bauq bauqlwnh gvaq. Mboengqneix, gicej youh caijfangj 4 aen doih fwen ndaw 23 aen doih fwen neix, dingq gyoengqde gangj gij goj mizyinx.

Aendoih Yienjciengq Fwenbizbaz Sanhgyangh: Swnjcienz Minzczuz Vwnzva Maenhndei Mbanjdung

Youq gwnz bi 2018 comzyienj fwen minzczuz vunznoix Guengjsae, aendoih yienjciengq fwenbizbaz Sanhgyangh yienjciengq ndaej ndei aeu-ndaej mingz daih'it baez comzyienj doxdax neix.

Aendoih yienjciengq neix dwg aen "gyoebhab bohlgw Dungcz", youz bohlgw sam boux gyoebbaenz, daxboh Siz Mingzveih、dahhung Siz Yez、dah'iq Siz Ginhcingh. Siz Mingzveih bi 1980 doekseng youq Sanhgyangh Dungcz Swciyen Liengzgouj Yangh Liengzgouj Cunh. De dwg bouxyienj nyuenz Sanhgyangh Dungcz Swciyen Dungcz Yisuzdonz, bi 2012 aen yisuzdonz neix gaij baenz Aen Cungsims Baujhoh Caeuq Hwngfat Feihvuzciz Vwnzva Yizcanj Sanhgyangh Dungcz Swciyen, seizneix de dwg bouxguhong aen cungsims feihyiz neix.

Siz Mingzveih 11 bi hainduj hag fwenbizbaz Dungcz, cujyau dwg canghfwen ndaw mbanj son de fwenbizbaz, doxboh、aulungz de hix rox fwenbizbaz Dungcz, gyoengqde cungj son Siz Mingzveih gvaq.

Bi 2013 ndwen 9, Siz Mingzveih daiq dahlwg hung hainduj gyoebbaenz aen "gyoebhab bohlgw Dungcz", cujyau yienjciengq fwenbizbaz、golaux Dungcz、go'iq Dungcz. Doengzbi, "gyoebhab bohlgw Dungcz" camgya ciengqyienj fwen minzczuz youz Guengjsae Namzningz Bozvuzgvanj cawjbanh haenx, ndaej sam daengj-ciengj; bi 2015 ndwen 12, "gyoebhab bohlgw Dungcz" camgya Liujcouh



▲ Aendoih yienjciengq fwenbizbaz Sanhgyangh.

► Bi 2017《Fwenduzmbaj》Yauzczuz camgya Guengjsae Veisi 《Gou Yaek Hwnj Sam Nyied Sam》.

Si cezmuz maenhndei doxdax ndaej ciengj yienjciengq ceiq ndei; "gyoebhab bohlgw Dungcz" lai baez camgya Guengjsae Densidaiz "sing ndeu gyaez maj·Diegdeih fwen mbinfoen" lanzmoeg loegguh. Geij bi neix daeuj lai baez ndaej ciengj gih、si、yienh lai aen hozdung doxdax gvaq. Bi 2017 ndwen 12 doxdaeuj, dah'iq gyahaeuj aen gyoebhab. Aen "gyoebhab bohlgw Dungcz" neix vih swnjcienz caeuq cienzboq minzczuz vwnzva Sanhgyangh guh'ok gungyen.

Mwh gicej caijfangj yawjraen, aen "gyoebhab bohlgw Dungcz" neix miz aen daegdiemj hawj vunz cimyawj he: Song dah lwg maj ndaej gig gyaeunde, daenj buhvaq minzczuz engq dwggyaez hawj vunz maez, daxboh bouxyienj okndang neix hix gig baenzmbauq, ndigah aen gyoebhab neix baez hwnj daiz couh yinx ndaej haujlai bouxyawj, bingzvej hix gya faen hawj gyoengqde.

"Dou ceiq yinx vunz lijdwg gij sing fwen Dungcz nyuenz miz neix." Siz Mingzveih riu naeuz, "Baenz lai bi doxdaeuj youq mwh yienjciengq fwen Dungcz, dou bungzdaengz haujlai vunz bangcoh gvaq dou caeuq gij saeh miz yiyi. Lumjbaenz ndaej daengz Denz Cingh bouxyinhoyzgyah

ciengqgo mizmingz、lauxhangz bauj-hoh feihvuzciz vwnzva yizcanj diemj-bingz caeuq dajyinx. Denz Cingh naeuz, aeu yawjnaek hwngfat fwen minzczuz bonjfaenh, aeu fwen minzczuz bonjfaenh yienj ndei, swnjcienz ndei engq youqgaenj." Dajneix, aen gyoebhab neix genhciz yienjciengq fwen Dungcz nyuenz miz neix, gyoengqde nyinhnaeuz baenzneix engq miz leih swnjcienz caeuq hwngfat fwen minzczuz bonjfaenh.

Aendoih Biujyienj Hwzsanh Cunh Fuconh: Daihdaih Doxcienz, Louz Gij Cingz Mbanj

Youq gwnz bi 2018 comzyienj fwen minzczuz vunznoix Guengjsae, hot fwen 《Fwenduzmbaj Yauzczuz》 aendoih biujyienj Hwzsanh Cunh Fuconh Yauzczuz Swciyen yienjciengq haenx ndaej daengz yienhcieengz bingzvej caeuq bouxyawj haenhndei.

Fwenduzmbaj Yauzczuz dwg gij fwen ndawbiengz Fuconh vunzlai dangdieg gangj cingz cienz cingz, aj ak cienzciengq haenx, gyoengq cangh-fwen youq gak giz mbouj doengz guh hong roxaeuz ngoenzciet couxbawx baehaq begsah ciengq haenx, ndei

dingq dangqmaz, gyoengqde ciengq ndwi roxaeuz doiq ciengq, gig miz minzczuz daegsaek, ndaej daengz gyoengq vunzlai haenggyaez. Fuconh Yauzczuz Swciyen Bwzsanh Cin Hwzsanh Cunh dwg dieggoek、dieg swnjcienz fwenduzmbaj, ndaw mbanj miz gyoengq beixnuengx Yauzczuz ndeu gig gyaez ciengq fwenduzmbaj. Bi 2008 《Fwenduzmbaj》 Yauzczuz Fuconh ndaej lied baenz guekgya gaep feihvuzciz vwnzva yizcanj, doengzbi Aen Cungsims Baujhoh Feihvuzciz Vwnzva Yizcanj Fuconh Yauzczuz Swciyen aeu Hwzsanh Cunh dingh baenz dieg baujhoh swnjcienz 《Fwenduzmbaj》 Yauzczuz.

Bi 2016 ndwen 6 ngoenz 24, 《Fwenduzmbaj》 Yauzczuz wngq Cunghyangh Densidaiz 《Hoihhung Minzgoh Cungguk》 cezmuzcuj iucingj, gyoengq bouxguhaz dieggoek caeuq dieg swnjceinz fwenduzmbaj Fuconh guekgya gaep feihvuzciz vwnzva yizcanj、hagseng yienh minzczuz cunghyoz、gyoengq bouxyienj yienh vwnzva'gvaj gungh 180 lai boux, bae Baekging loegguh cezmuz, hawj fwenduzmbaj sing ndei neix ciengq ok Mbanjyauz, ciengq daengz Baekging, ciengqgok daengx guek.

(caengz sat)



▲ Aendoih biujyienj Hwzsanh Cunh Fuconh.

